



銜蟬小錄卷三

典故

仁和孫蓀意秀芬輯

晝息鼓琴

聖跡圖孔子晝息於室而鼓琴閔子自外聞之以告曾子曰鄉也夫子鼓琴音清澈以和論入至道今更爲幽沉聲夫子何所感而若是二子入問孔子曰然固有之吾見貓方取鼠而欲得之狀故爲此音可與聽音矣

曾子知音

韓詩外傳孔子鼓琴曾子子貢側門而聽曲終曾子曰嗟乎夫子琴聲殆有貪狼之志邪僻之行何其不仁子貢以曾子之言告子曰嗟乎參天下賢人也其習知音矣向者

後魏小錄 卷三
正鼓琴有鼠出游狸見於屋循梁微行造焉而避厭目曲
脊求而不得正以琴淫其聲參以正爲貪狼邪僻不亦宜
乎

戚夫人

戚夫人及帝崩高后乃令永巷囚戚夫人髡鉗衣
赭衣令春戚夫人春已歌曰子爲王母爲虜終日春薄暮
嘗與死爲伍相離三千里當使誰告汝太后聞之大怒曰
乃欲倚汝子耶召趙王如意鴆之戚夫人遂有人斲之禍
戚夫人臨死曰願呂爲鼠我爲貓生生世世食其肉

鸚鵡同器食

朝野僉載則天時調貓兒與鸚鵡同器食命御史彭先覺
監遍示百官及天下考使傳看未遍貓兒饑遂齧殺鸚鵡
以餐之則天甚愧武者姓殆不祥之徵也

禁畜貓

唐書高宗廢后王氏傳帝念后間行至囚所呼曰皇后良
娣无恙乎武后知之杖二人百良娣罵曰武氏狐媚翻覆
至此我後爲貓使武氏爲鼠吾當扼其喉以報后聞詔六
宮毋畜貓

獠子亂局

開天遺事一日明皇與親王棋令賀懷智獨奏琵琶妃子
立於局前觀之上欲輸次妃子將康國獠子放之令於局
上亂其輸贏上大悅

判爭貓兒狀

開元傳信記裴寬子譔素好談諧爲河南尹有婦人投狀爭貓兒狀云若是兒貓兒卽是兒貓兒若不是兒貓兒卽不是兒貓兒譔大笑判其狀云貓兒不識主傍家捉老鼠兩家不須爭將來與裴譔遂納其貓兒爭者皆哂之

貓鼠同乳

正史舊唐書朱泚上言隴州將趙貴家貓鼠同乳不相爲害詔遣中使示於朝宰相常袞率百僚慶賀吏部侍郎崔祐甫獨否中官詰其故答曰此物之失常也上奏言禮曰迎貓謂其食田鼠也今對鼠不食死乃失於性乎且貓受人養育職旣不脩亦何異於法吏不勤觸邪疆吏不勤捍敵以茲稱慶臣所未詳代宗深嘉之

鼠齧貓

唐書五行志弘道初梁州倉有大鼠長二尺餘爲貓所齧數百鼠反齧貓少選聚萬餘鼠州遣人捕擊殺之餘皆去

犬乳隣貓

唐書李迥秀傳李迥秀中宗朝爲兵部尚書事母孝武后嘗遣內人候其母或迎至宮中後所居堂產芝艸犬乳隣貓中宗以爲孝感詔旌表其門閭

食貓鬪豪

朝野僉載眞觀中恒州有彭闢高瓚二人鬪豪時於大圃場上兩朋競勝闖活捉一豚從頭齧至頂放之地上仍走

後漢小錄 卷三 三
瓚取貓兒從尾食之腸肚俱盡仍鳴喚不止闌於是乎貼然心服

貓鼠同處

五行志龍朔年洛州貓鼠同處鼠隱伏象盜竊貓職捕囓而反與鼠同象同盜者廢職容姦

戴柳圈

月令廣義唐高宗幸渭水祓除賜羣臣細柳圈辟厲今俗清明以柳圈小兒戴之至於貓狗亦以柳圈蓋辟厲遺意
帶金鎖
酉陽雜俎平陵古譚國也城中有一貓常帶金鎖有錢飛若蚨蝶土人往往見之

不畜貓

柳宗元三戒永有某氏不畜貓爲愛鼠也

策貓事

邵思野說江南二徐大儒也後主岐王六歲時戲佛像前有大琉璃瓶爲貓所觸割然墮地因驚得疾而薨詔諧爲墓志錯謂鉉曰此文雖不引貓事但此故實頗記憶否鉉爲疏二十事錯曰適已憶七十餘事鉉曰楚金大能記明日又云夜來復得數事兄撫掌而已

妓誘曹翰

江南野史曹翰使江南惟事嚴重後主死以爲計韓熙載乃使官妓徐翠筠爲民間裝飾紅絲標杖引弄花貓以誘

之翰見果問主郵者此女爲誰僞對曰娼家翰因命之至
旦去與金帛一無所受曰止願天使一詞以爲世寶翰不
得已撰春光好詞遺之及翰入謝因留宴使妓謔此詞翰
知見欺乃痛飲月餘而返

搏食梁燕

太平廣記漢戶部侍郎范質言嘗有燕巢於舍下育數雛
已哺食矣其雌者爲貓所搏食之雄者啁啾久之方去卽
時又與一燕爲匹而至哺雛如故不數日諸雛相次墮地
宛轉而殭兒童剖腹視之則痰藜在嗉中蓋爲繼偶者所
害

神竟記元貞二年雙燕巢於燕人柳湯左之宅一日家人

舉火照蠍其雄驚墮爲貓所食雌悲鳴不食朝夕守巢哺
雛成翼而去明年雌復獨來其處人視巢有二卵疑其更
偶徐視之則抱雛之壳耳自是春去秋來

夢貓

朝野僉載薛季昶爲荊州長史夢貓兒伏臥於堂限上頭
向外以問占者張猷猷曰貓兒者爪牙伏門限者闔外之
事君必知軍馬之要未旬日除桂州都督嶺南招討使

風牡丹圖

米芾畫史徐熙風牡丹圖葉幾千餘片花只三朵一在正
面一在右一在衆枝亂葉之背石竅圓潤上有一貓兒余
惡貓兒數欲翦去後易與唐林夫蔣長源以二十千置黃

荃畫貓顛勃荷甚工

日午牡丹

埤雅近人有收牡丹圖者叢下有一貓未知其優劣有別畫者曰此正午時牡丹也何以明之其花枝哆而色燥此日中時花也貓眼黑睛如綫此正午時貓眼也凡帶露花則房斂而色澤貓睛早暮則睛圓日漸午狹長正午則如一綫耳人稱其善求古人之意

名人繪事

宣和畫譜李藹之有藥苗戲貓圖子母戲貓圖藥苗雛貓圖醉貓圖戲貓圖子母貓圖小貓圖薑貓圖何尊師有葵石戲貓圖葵石羣貓圖葵花戲貓圖山石戲

貓圖石竹花貓圖莧菜戲貓圖子母戲貓圖薄荷醉貓圖戲貓圖羣貓圖

滕昌祐有茴香戲貓圖

韋元添京兆人有戲貓圖

王凝有繡整獅貓圖

黃荃有螻蛄戲貓圖食魚捕雀二圖

趙昌黃荃徐熙崔白俱有牡丹戲貓圖

吳元瑜有紫芥戲貓圖

易元吉有藤整戲貓圖又子母貓圖唐宋畫家多有之

邱慶餘畫有月季貓圖

郭乾祐有顧蜂貓圖

張元畫白玉狻猊藉錦茵

高蔚生蕉下蹲貓圖蕉染色餘皆水墨貓飛白

劉後村跋楊通老移居圖一童子肩貓

名畫記江南士人家有貓奴戲蝶圖

名畫評何尊師貓有展膊者

閩書李交善圖貓世人珍之

書畫彙考南宋畫院朱紹宗蕭翼賺薄荷醉貓圖

書畫見聞錄明宣宗宮貓圖貓七頭蜂二落果三貓看蜂

蹴果

明王武有水墨獅貓立石上看飛蚱蜢圖

國朝沈荃有花下戲雙貓圖甚工

畫貓難工

宣和畫譜若乃貓狸又近人之物最難爲工花間竹外舞
裊繡幄得其不爲搖尾乞憐之故工至於此者世難其人

畫貓專門

何尊師以畫貓專門嘗謂貓似虎獨耳大眼黃不相同其
畫澤吻摩牙無不曲盡惜乎尊師不充之以爲虎止工於
貓殆寓此以遊戲耳

畫貓尤工

李藹之華陰人工畫山水泉石畫貓尤工若世之畫貓者
必在花下而藹之獨畫在藥苗間

開口貓兒

後漢小錄 卷三
宋郭思畫論凡畫龍開口者易爲巧合口者難爲工畫家稱開口貓兒合口龍言其兩難也

佳味

清異錄靖康元年冬都人受圍四十餘日易子而食有以子肥瘦不等而爭訟者富人貴戚以雀鼠貓犬爲佳味相送惠

蹴貓見逐

揮塵餘話紹興壬子詔知大宗正事安定郡王令疇訪求宗室伯字號七歲以下者十人入宮備選十人中又擇二人焉一肥一癯迺留肥而遣癯賜銀三百兩以謝之未及出思陵忽云更子細觀迺令二人又手並立忽一貓走前

肥者以足蹴之上曰此貓偶爾而過何爲遽踢之輕易如此安能任重耶遂留癯而逐肥者癯者乃阜陵也肥者名伯浩後終於溫州都監

五德雅謔

揮塵新談萬壽寺有彬師者善謔嘗對客貓踞其旁彬謂客曰人言雞有五德今吾此貓亦有之客問其說曰貓見鼠不捕仁也鼠奪其食而讓之義也客至設饌則出禮也藏物雖密能竊食之智也每冬月輒入竈信也客聞之爲之絕倒

綠紗爲帷

南部新書連山張大夫搏好養貓衆色備有皆自製佳名

每視事退至中門數十頭曳尾延頸盤接而入以綠紗爲帷聚其內以爲戲或謂搏貓精

犬乳貓子

張孟仁妻鄭妙安張孟義妻徐妙圓徐富鄭貧徐不驕鄭不諂徐母家有遺送必納舅姑所用則請之不問孰爲己物鄭有子徐乳之徐有子鄭乳之不問孰爲己子子亦不知孰爲己母家有一貓一犬因貓爲人竊去犬就貓子乳之人以爲和氣所感

貓犬互乳

智囊河東孝子王燧家貓犬互乳其子言之州縣遂蒙旌表訊之乃是貓犬同時產子取其子互置窠中飲其乳慣

遂以爲常

廣聞錄弘治初年潮陽蕭瓚家畜乳狗黃色高大異常適二貓亦乳狗常哺之共宿同游一如其子

守僧屍

夷堅志宋紹興中全椒縣治有山庵一僧居之養一貓一犬極馴一日有盜殺僧而據其囊鉢以去庵犬竊隨以行過村鎮則奮擲而前視盜嗥吠盜行又隨之至縣治愈極哀鳴市人多識庵中犬又見盜數低首遂與俱詣庵時微暑一貓守僧屍傍故鼠不加害執盜赴獄不能抵餽遂伏辜

和神國無貓

元怪錄和神國地產大瓠瓠中皆五穀不種而實水泉皆如美酒飲多不醉氣候常如深春樹木皆彩絲可爲衣又無虎豹貓鼠擾害之類眞仙境也

圖形茶肆

老學庵筆記秦檜孫女小名童夫人愛一獅貓忽亡之立限命臨安府訪求及期貓不獲府爲捕繫隣民且欲劾兵官兵官惶恐步行求貓凡獅貓悉捕致而皆非也乃賂入宅老卒詢其狀圖百本於茶肆張之府尹因嬖人祈懇賂以金貓乃已

觸上不咎

三朝野史理宗祀明堂徐清叟爲執綬官玉音問曰貓兒捕鼠如何答曰愛之欲其生惡之欲其死理宗本命屬鼠一時不覺觸突上亦不之咎

不禁畜貓

曲洧舊聞崇寧初范致虛上言十二宮神狗居戌位爲陛下本命今京師有以屠狗爲業者宜行禁止因降指揮禁天下殺狗賞錢至二萬太學生初聞之有宣言於衆曰朝廷事事紹述熙豐神宗生戊子年而當年未聞禁畜貓也

河鮑有毒

楓臆小牘東坡謂食河鮑值得一死余過平江姻家張諫院言南來無他快事祇學得手煮河鮑耳須臾烹煮對余方食忽有客見顧俱起延欸爲貓翻盆犬復佐食頃之貓

犬皆死幸矣哉奪兩人於貓犬之口也乃泮中食店以假河鮑餉人以今念之亦足幸甚

饑蟲

類編從政郎陳撲富沙人母高氏年六十餘得饑疾每作時如蟲嚙心卽急索食食罷乃解如是三四年畜一貓極愛之常置於旁貓叫則取魚肉和飯以飼一日貓適叫命取鹿脯以自嚼而啖貓至於再覺一物上觸喉間引手探得之如拇指大墜於地頭尖匾類塌沙魚身如蝦殼長八寸漸大俾兩指其中盈實剖之腹肚亦與魚同有八子胎生蠕蠕若小鰍人皆莫能識爲何物蓋聞脯香而出高氏疾卽愈

義貓

聖師錄姑蘇齊門外一小民負官租挈家出避獨遺一貓催租者持去賣於閭門質庫年餘小民過質庫門貓於人叢中躍入其懷爲質庫中人見而奪去輒悲鳴顧視不已其夜民臥舟中聞篷間有聲視之貓也口啣一綾悅內有金五兩小民貧甚得金大喜相聚如初

青色貓

程史子辛未歲宦中都居旌忠觀前家素畜一青色貓善咋鼠家人咸愛之一日正午出門卽逸去購求竟不獲

染貓

癸辛雜志回回國婦人以鳳仙花染貓爲戲

在園雜識貓有染色大紅者

乾紅貓

智囊臨安北門外西巷有賣熟肉孫三者每出必戒其妻曰照管貓兒都城無此種莫令外人聞見或被竊去絕吾命矣我老無子此與我子無異也日日申言不已鄉里數聞其語心竊異之覓一見不可得一日忽曳索出門妻急抱回其貓乾紅色尾足毛鬚盡然見者無不駭羨孫三歸責妻慢藏箠詈交至已而浸淫於內侍之耳卽遣人啖以厚直孫峻拒內侍求之甚力返覆數四僅許一見益不忍釋竟以錢三百千取去孫流涕復箠其妻竟日嗟悵內侍得貓喜極欲調馴然後進御已而色澤漸淡才及半月全

成白貓走訪孫氏已徙居矣

周思得

兩湖塵談周思得杭城人少學符術永樂中召赴京寓大德觀祈禱雨晴呼召風雷累應每朝廷有問則中貴賚御封詞旨赴觀設香案焚之周與不知也頃之神降則歷歷指陳如見一日神降頗怒周曰有旨故敢召何怒爲神曰小事可瀆吾耶周問奚小事曰失一狸奴耳誤入某閣仰塵板中死恙也果於其處得狸奴其他靈驗不可殫紀

供貓食

夢華錄相國寺每月五次開放萬姓交易大三門上皆是飛禽貓犬之類珍禽奇獸無所不有 諸色雜賣若養馬

則有兩人日供切草養犬則供餵糟養貓則供貓食并小魚

穴米捕巨鼠

湖海搜奇衍聖公庾廩中有巨鼠爲暴狸奴被啖者不可勝數一日有西商攜一貓至形亦如常索價五十金曰保爲公殺此公不信商因要文契而縱之曰克則受金公乃聽之貓入廩穴米自覆而露其喙鼠行其旁嗅之貓躍起嚙其喉鼠哀鳴跳躍上下於梁者數十度而貓持之愈力遂斷其喉貓亦力盡俱斃明日驗視鼠重三十餘觔公乃如約酬商

吳夫人

可談舒王吳夫人有潔疾其意不獨恐污己亦恐污人長女之出省之於江寧夫人欣然裂綺縠製衣將贈其甥皆稱異也忽有貓臥衣笥中夫人卽叱起婢揭衣置衣浴室下終不肯與人竟腐敗無敢收者

崔白畫貓

可談近世長吏生日僚佐畫壽星爲獻例只受文字其畫却回但爲禮數而已王安禮自執政出知舒州生日屬吏爲壽或無壽星畫者但有他畫軸紅繡囊緘之必謂退回王忽令盡啟封掛畫於廳事標所獻人名銜於其下良久引客焚香共相瞻禮其間无壽星者或用佛像或神鬼唯一兵官乃崔白畫三貓旣至前慚懼失措

沉香棺瘞貓

吳軻合肥宗伯所寵顧夫人名媚性愛貓奴有字烏員日於花闌繡榻徘徊撫玩珍重之意踰於掌珠飼以精粲嘉魚過饜而斃夫人惋悒累日至爲輟饌宗伯特以沉香斲棺瘞之延十二女僧建道場三晝夜

辟穀珠

談林弘治間鄱陽常豐倉有大鼠貓捕之輒被嚙死後入一大貓兩相嚙三日始寂然及啟視貓鼠皆死鼠較貓尤大日久鼠腐一童以鋤碎鼠腦中一珠黃光明瑩可愛取而鑽成孔以繩繫衣帶間偶與羣兒據石爲戲一賈胡見珠求玩問所自得童子言得自鼠首賈故欲以銀五兩易

之童子亦黠慧乃曰欲買此須百金胡許十金童子以告其父遂索胡三十金而與之詢其所用胡曰此珠可以辟穀卽數千人出征每人略啣此珠三日常飽可無饑渴之患蓋穀之精氣所結也

釜鳴

廣聞錄嘉靖癸巳三月初天界寺銅鍋可容米五十石日用炊煮忽鳴聲如牛一貓臥鍋蓋上爲搖入鍋中踰時乃止

白傘蓋咒

陶朱新錄郭堯字獻可妻高氏日誦白傘蓋咒郭氏兵火後避地山陽一日獻可謂之曰汝誦此咒何益因戲指所

畜貓曰能令此貓託生爲人否高氏遂於貓前誦其咒是夜貓果死獻可以爲偶然又數日捕得野貓又謂高氏曰能更使此貓爲人乎高爲誦咒其貓夜亦死

獄中畜貓

寓圃雜記陸昶孟昭心多惻隱爲刑官十三年入獄見重囚皆三木仰臥於床不能轉動被鼠夜嚙流血涔涔甚憫之遂買數貓置獄中鼠患頓息囚多感泣自此獄中畜貓矣

解彥

雪濤譚叢余邑諺云猪來窮家狗來富家貓來孝家故猪貓二物皆爲人忌有至必殺之而邑中博士名張聖宗者

解曰諺語正不爾無足忌者蓋窮家籬穿壁破故猪來非猪能兆窮也富家飲饌豐遺骨多故狗來非狗能兆富也家多鼠蟲爲耗故貓來孝家則耗之訛非貓能兆孝也

貓食盆

在園雜志明內官家飼貓用上號銅質今宣鑪內有名貓食盆者是也

飼貓

清波雜誌蘇伯昌初筮長安獄掾令買魚飼貓乃供猪襯賜詰之云此間例以此爲貓食乃一笑畱以充庖同寮從而逐日買魚食蓋北品以羊爲貴

入蜀記過楊羅泐皆巨魚欲覓小魚飼貓不可得

轉劫輪程伊川先生偶見以魚哺貓擇可生者養之

鼠多貓少

金陵鎖事駕部王仲山間邀四司飲天界萬松庵見鼠過因各談鼠事一人云世間鼠多貓少貓一鼠百鼠出力共敵一貓寡能勝衆乎僧官程葦杭曰只是死一鼠敢出頭耳衆皆笑

僧不畜貓

梵網經若佛弟子不得長養貓狸猪狗若故養者犯輕垢罪

涅槃經比丘不應受畜奴婢僕使雞猪貓狗等獸沙彌律儀一曰不殺生乃至瀘水覆燈不畜貓狸等皆慈

悲之道也

野貓誑雞

佛說野雞經往劫時有野貓住叢樹林產經饑餓樹上有一野雞毛色姝好野貓懷毒欲危雞命徐來樹下以柔輿辭當爲作妻野雞報言仁者四脚我身兩足何可夫婦野貓復曰君身端正顏貌第一吾亦微好共相娛樂野雞報言吾不識卿是誰何求野貓曰我不食肉曝露清修禮事諸天野雞答言未曾見聞野貓修行美詞巧笑吾終不信吾衣毛豎世世離卿若其相親壽命難保

雜寶藏經佛言過去世雪山之側有山雞王多將雞衆而隨從之雞冠極赤身體甚白語諸雞言汝等遠離城邑聚

落莫與人民之所噉食好自慎護時聚落中有一貓子聞彼有雞便往趣之在於樹下徐行低視而語雜言我爲汝婦汝爲我夫而汝身形端正可愛我相承事安穩快樂雞說偈言貓子眼黃愚小物觸事懷害欲噉食不見有畜如此婦而得壽命安穩者

相乳

轉劫輪馬燧家貓有生子同日者其一母死焉其二子飲於死母且死其鳴伊伊其一方乳子起而若聽之走而若救之啣其一置其棲又往如之反而乳之若其子韓愈有感而爲貓相乳說

殉節

轉劫輪金陵一仕宦子酒色蕩廢先業公私交逼死聊一日備餽與妻永訣貓初向几上噉噉欲食旣而夫妻相對泣不能下咽遂自縊而死貓乃哀鳴躑躅救之无策肥甘滿案不之顧叫噉數日不食而死

訥庵偶筆有人病膈每食輒吐一貓在其前吐出之食貓遂食之後卒貓於棺前哀鳴七日不食死

新齊諧江寧王御史某父有老妾年七十餘畜十三貓愛如兒子各有名呼之卽至乾隆己酉老妾亾十三貓繞棺哀鳴餵以魚餐流泪不食餓三日竟同死

啖鼠絕衣食

堅瓠集吾蘇張氏居都憲行臺之東日聚羣鼠觀者紛至

輒投以錢家貧賴以稍裕後有無賴懷一貓以往羣鼠應呼而出擲之以貓啖其一二餘俱驚避後竟不出張氏衣食絕焉

白鼠怪

堅瓠集鹽城令張雲在任養一貓甚喜及行取御史帶之同行至一察院素多鬼魅人不敢入雲必進宿夜二鼓有白衣人向張求宿被貓一口咬死視之乃一白鼠怪遂絕

社公擊貓

堅瓠集吳康齋家畜一雞司晨爲貓所嚙作詩焚於土穀神祠曰吾家住在碧巒山養得雄雞作鳳看却被野貓來嚙去恨無良犬可追還甜株樹下毛猶濕苦竹叢頭血未

乾本欲將情訴上帝題詩先告社公壇後一夕雷雨天明人見貓震死壇前

胡任之

異林胡宏字任之寧波人少讀易遇一道人與語曰我有祕術子可受之但不營仕乃可免禍耳宏曰謹奉教遂以卜筮受之發無不中有一人家暴富心疑之宏爲設卦曰家有狸奴走入室是其祥也曰然曰狸形必大可稱之得幾觔曰七觔許曰富及七載狸奴當去何能久遠及期狸果去不見家貧如初

緣毛狸藉

飛燕外傳婕妤上皇后賀儀有舍香緣毛狸藉一鋪

奇技

見聞錄唐飛龍衛韓志和善雕木作鸞鶴鷓鴣凌雲奮飛
一二百步之外刻作貓兒以捕雀鼠

黃貓皮壁幃

輟畊錄元京師宮闕冬月大殿則黃貓皮壁幃黑貂褥

貓頭鞋

崇禎官祠注崇禎五六年間宮眷每繡獸頭於鞋上以辟
不祥呼爲貓頭鞋識者謂貓旄也兵象也

繪貓易米

稗販明簡王初國于廣寧徙封荊州七傳而至憲熿素無
行國除禁錮鳳陽按廢王雅工詞畫禁錮後貧不能自存

常繪貓易米所誤買花聲詞含思悽楚不減南唐後主云

肉鼠

漱石閒談金壇鄧某以素封冠其鄉善飲啖每飯米五升
豚肉一肘鵝雞鴨各一隻雜俎與酒不計大約一飯須數
十觔口必重餐遇負逋者能具豐饌享之輒焚其券有佃
戶負其租數多治具召之鵝爲貓所食卽殺貓以充雜俎
鄧以爲甘而食之此後卽不能多食矣識者謂其腹有肉
鼠鼠見貓卽死故不能多食也常聞能飲者腹有酒蠅則
善啖者有肉鼠亦無足異肉鼠酒蠅可爲的對

鼠能殺貓

三岡識略廣西柳州分司署有大鼠爲怪嚙壞附近居民

衣物不可勝紀募貓捕之反爲所斃半年之內連殺五貓
便捷如猿白日遊行人不能禁適郡紳龍其從平越攜一
貓歸小而健云能辟鼠旣至伏梁棟間扼而殺之鼠能殺
貓亦異事也

捕巨鼠

聊齋志異萬厯間宮中有鼠大與貓等爲患甚劇徧求民
間佳貓捕之輒被噉食適外國來貢獅貓毛白如雪抱投
鼠屋闔其扉貓登几上鼠亦登貓則躍下如此往復不啻
百次衆咸謂貓怯以爲是死能爲者旣而鼠跳躑漸遲碩
腹似喘蹲地上貓卽疾下爪掬頂毛口齧首領轉輾爭持
貓聲嗚嗚鼠聲啾啾啟扉急視則鼠首已嚙碎矣

鼠魂

觚賸嶽松僧習靜於新城之地藏庵忽得異疾遇有微響
如蠅翼之動輒驚怖欲絕因鍵錮其戶潛臥邃室餽以食
者於暗中嘿然進之師亦瘖不能語首點指畫而已夜不
合眼者二年有餘百藥不效平湖醫士崔紹巖以嶽師之
疾告之崔曰聞方書云凡貓逐鼠急鼠則先失其魂遂伏
之不動貓乃擒噬病者偶感其氣以鼠魂易人魂故獲此
疾然易療也嶽師延崔診視投以解毒安神之劑不旬日
而愈

張德純

松陵文獻張舍字德純以字行居梅里以畫貓自給人或

買懸堂中真貓見而怒與之鬪名遂重知縣劉時俊高其
行常屏騶從造其門短几山肴相對移晷

大貓

驚喜集陸梯霞云貓有大如豕者

子不語靖江張氏家有貓爲怪後爲雷擊死身大如驢

鼠頭十二

吹影編王觀察家一狸貓向王求食王戲語之曰爾未能
捕鼠何食爲強與之明日晨起床前置鼠頭十二蓋貓所
捕也

孝貓

秋坪新語李文園學士家常蓄一牝貓生二子牝牡各一

後牝死牡在其母每臥則必枕其子子爲所枕時帖耳瞑
目癡若土木蓋恐驚母臥也身痒偶少轉側母卽怒嚙爪
裂往往血毛絲落子伏首順受無敢逆如是者數年留心
察之蓋百不一失也母後以癩死子哀號嗷嗷晝夜不絕
聲飼之不食偶窗間有繫物繩垂下且日視之貓縊其上
纏百結急不可解衆咸嘆異呼爲孝貓

憲貓

隨園詩話鄒太和學士戊戌翰林和雅謙謹有愛貓之癖
每宴客召貓與兒孫側坐賜孫肉一片必賜貓一片曰必
均毋相奪也督學河南按臨商邱畢出署失一貓檄督縣
捕尋令苦其煩用印文詳報云卑職遣幹役四人挨民家

後漢小錄 卷三
搜捕至今踰限憲貓不得

銜蟬小錄卷四

神異

仁和孫蓀意秀芬輯

祀貓鬼

北史獨孤陀性好左道其外祖母高氏先事貓鬼已殺其舅郭沙羅因轉入陀家每以子日夜祀之子者鼠也貓鬼每殺人取其財物置於所事貓鬼家鬼若降人則面正青若被牽曳陀後敗免死

金谷園記隋文帝開皇十八年五月禁畜貓鬼蠱毒厭昧野道者獨孤后之弟延州刺史陁有婢事貓鬼能使之殺人會后與楊素妻俱有疾醫皆曰貓鬼疾也上意陁所爲令高頴等雜治之具得其實詔夫婦皆賜死

朝野僉載隋大業之季貓鬼事起。養老貓爲厭魅頗有神靈遽相誣告京都及縣邑被誣戮者數千餘家蜀王秀皆坐之隋室旣亾其事亦寢

化龍

稽神錄王建稱尊於蜀其嬖臣唐道襲爲樞密使夏日在家會大雨其所畜貓戲水於簷溜下道襲視之稍稍而長俄而前足及簷忽爾雷電大至化爲龍而去

人言

北夢瑣言唐左軍容使嚴遵美閹宦中仁人也自是嘗思退休一日發狂手足舞踏家人咸訝傍有一貓一犬貓忽謂犬曰軍容改常也顛發也犬曰莫管他從他俄而舞定

自驚自笑且異貓犬之言遇昭宗播遷乃求致仕

太平廣記徐州有寄褐道士王守眞蓄妻子而不居宮觀行極凡鄙常遊太乙宮竊攜道流所佩之籙而歸寘於臥榻蓐蓆之下覆以婦人之衣褻黷尤甚怪異數見燈檠自行貓兒語莫如此莫如此不旬日夫妻早卒

誌異

宋史宋紹興二十二年劉彭老家貓產數子皆三足紹熙元年三月臨安府民家貓生子一有八足二尾慶元元年六月鄱陽縣民家一貓帶數十鼠行止食息皆同如母子相哺者民殺貓而鼠舐其血

鬻醢者

稽神錄建康有鬻醢者其蓄一貓甚俊健愛之甚辛亥歲六月貓死某不忍棄猶置坐側數日腐且臭不得已攜棄秦淮中既入水貓乃活某下救之遂溺死而貓登岸走烏金鋪吏獲之縋而鐻之鋪中鎖其戶出白官司將以其貓爲証既還則已斷索嚙壁而去竟不復見

貓王

續已編景泰初西番貢一貓道經陝西莊浪驛時福建布政司朱彰以事謫爲驛丞使驛問貓何異而上供使臣書示云欲知其異今夕請試之其貓盛罩以鐵籠納於空室內明日起視有數十鼠伏籠外盡死使臣云此貓所在雖數里外鼠皆來伏死蓋貓之王也

拱手

續墨客揮犀鄱陽龔冕仲自言其祖紀與族人同應進士舉唱名日其家衆妖競作牝雞或晨鳴犬或巾幘而行鼠或白晝羣出至於器皿之類或變易其常處家人驚乃召女巫徐母者使治之時尚寒巫與主人倚爐而坐有一貓正臥爐側家人指爲母曰吾家百物皆爲異不爲異者獨此貓耳於是貓亦人立拱手而言曰不敢姥亦大駭馳去後數日捷音至二人皆高第矣竟亦死他是知妖異未必盡爲禍也惟當鎮靜以待之耳

貓鼠同年

藝餘耳語華山寶華寺江南大叢林也香積廚畔多白老

鼠聽柝聲而就食殆亦多年到寺游玩者爭投香餌鼠性多疑不敢獨行來則成羣得食歸洞有好事者見而叱之語曰此輩久則成怪吾家有貓足跡所至羣鼠遂空遂至家取貓上山放鼠穴外貓怒目相窺聲如虎吼未幾大鼠率羣鼠出向貓額拱手貓亦望鼠作頓首狀鼠貓環視半晌而散觀者大奇白諸大和尚和尚曰此貓鼠皆同年生於九峰已六十年未得一見會於佛地故歡悅如此

貓睛

瑯環記南番白湖山出貓睛極多古傳此山有夷人素無生業惟畜一貓貓死埋於山中久之貓忽見夢曰我已活矣不信可掘觀之及掘貓身已化惟得二睛堅滑如珠中

間一道白橫搭轉側分明驗十二時死誤與生不異夜又見夢云中一顆赤色有光者吞之得仙矣夷及吞卽有一貓如獅子負之騰空而去今此山最多貓睛一名獅負仙女上元宗獅負二枚卽此

客退記談用蠶豆四十九粒陰陽水浸端午日午時呪之埋室西地下令貓踞其上七日化爲貓睛

溺鑪壞丹

昔劉向爲世儒宗乃得淮南祕書上之天子令典上方作事甚費蘇子由亦曾試之將舉火見一大貓據鑪而溺叱之不見終亦不成

談圃子由嘗爲黃白術先治一室甚密中置大鑪將舉火

見一大貓據鑪而溺須臾不見子由以爲神仙之術天使濟貧乏待其人然後傳予非其人遂不復講

采異記許遜有幻術每爲人燒丹必厚取其資云市藥造鑪使其人自守而候之每燒四十九日將成必有犬逐貓觸其鑪破雙鶴飛去屢如此時人呼爲化鶴丹

東陽夜怪

東陽夜怪錄元和中彭城秀才成自虛就舉東還路出東陽驛風雪夜投佛寺暗中有一老病僧俄復有數人至以自虛舉子各述所作詩喧論達曉自虛方欲自誇舊製一無覩矣及追尋始知病僧自稱智高者是病橐駝稱前河陰轉運巡官盧倚馬是驢稱桃林客輕車將軍朱正中是

牛敬去文是狗奚銳金是雞苗介立是貓胃藏瓠是一刺蝟藏瓠下者苗介立詩爲慙食肉主恩深日晏蟠桃臥錦衾且學志人知白黑那將好爵動吾心

貢院將軍

括異志嘉異貢院西廊之第三間極北舉子常有爲魅所憑而至死者或如貓或如婦人每一發喊則妖氣愈甚丙午歲將赴舉監試官忽夢有人自稱貢院將軍云我死於此地今得爲神每舉子死於場屋者皆我輩爲之可立廟於西北隅事我則免於是明言於府以立祠焉

白虎神

陳藏器本草白石獅子石主白虎病江東人呼爲歷節風

置此於病者前自愈亦厭伏之意也白虎糞神名狀如貓掃屎置門下令人病

貓兒相公

吳山喜神廟二十四位喜神乃斗府遊戲神其第十五尊濟寧侯名謝宥號貓兒相公祀之主散訟

時媚鬼

摩訶止觀曰治時媚鬼者須善識十二時三十六時獸如子有三貓鼠伏翼丑有三牛蟹鼈知時喚名媚即去也

鬼形如貓

釋藏護童子經旃檀神王座下一十五種鬼其第十一名曼多難提形如貓兒著諸小兒眠中善啼喜笑

大悲陀羅尼經若有貓兒所著者取弭哩吒那燒作灰和淨土泥捻作貓兒形於千眼像前咒鑿鐵刀子一百八遍段段割之遍遍亦一百八段一咒一稱彼名即永差不著弭哩吒那死

貓頭骨也

貓怪

說聽金華貓畜之三年後每於中宵蹲踞屋上仰口對月吸其精華久而成怪入深山幽谷朝伏匿暮出魅人逢婦則變美男逢男則變美女每入人家先溺於水中人引之則暮見形凡遇怪者來時如人日久成疾夜以青衣覆被上遲明視之若有毛必潛約巡徒牽數犬至家捕貓剥皮炙肉以食病者方愈若男病而獲雄女病而獲雌病不治

矣府庠張廣文有女十八殊色也爲怪所侵髮盡落後捕雄貓始瘳

土司變獸

述異記土司楊姓者能變三獸土人知之至變虎之期逐家比戶閉門不出豫開城門彼則望深林騰躍而去一宿卽返返則仍爲人若變驢則土人置薤豆草具於通街恣啖一飽變貓不過竊肉食之須臾則爲人云係祖傳世世如此其變獸亦有定期故得備之

災青

祐山雜說嘉靖癸丑三月嘉興宣公橋失火延燒甚衆土人黃湛泉偶至郡舟泊橋下望見火中一物如貓火愈熾

其物愈大少頃卽成一大紅人湛泉歸數日家亦被火蓋先兆云

二申野錄弘治丙子七月六合縣一家揭席忽見黑貓自床驚起逐出其家火出門競逐至者輒火時焚二十九家聽經

甌江逸志平陽靈岫寺僧妙智畜一貓每遇講經輒於座下伏聽一日貓死僧瘞之後瘞處忽生蓮花衆發之花自貓口中出

坐化貓

後山叢談廬山有坐化貓

山兔化貓

水曹清暇錄燕臺新月令其十月山兔化爲貓

虎精

虎薈乾道六年江同祖爲湖廣總領所幹官由漢川抵陽臺驛雞初鳴卽起驛吏曰此方最荒寂多猛獸而虎精者素爲人害今須辨色上道江如其言與阜隸共三騎及兩卒前行起差早覺人馬辟易行半程忽見一婦人在馬前年可四五十縮獨角髻面色微青不施朱粉雙目絕赤殊眈眈可畏着褐衫繫青裙曳草履抱小狸貓乍前乍後相隨遂不置將弛擔乃不見江心念豈非所謂貓精者乎祕不語人及還舍且一月聞門外金鼓叫噪聲士庶環集者幾千數若捕押凶盜然出視之則又彼婦也問其故皆言

南市人家連夕失猪狗并小兒甚多物色姦竊無有也獨小客店內此婦人單身儼止三經旬矣而未嘗烟爨囊无一錢但謹育一貓望其吻時有毛血沾污疑必怪物是以訟於官戎邏報送府郡首李壽卿傳卽使至簽廳供狀婦人氣概洋洋无怖色自能把筆作字云冤苦情極願侍郎做主李不忍窮治姑令責戒勵狀押出境後不知所在錄異記嘉陵江側有婦人年五十餘自稱十八姨往往來民家不飲不食每教人但作好事莫違負神理若爲惡事者我常令貓兒三五箇巡檢汝來語畢遂去或奄忽不見民間知其爲虎所化也皆敬而懼之

三脚貓

七修類彙俗以事不盡善者名之曰三脚貓嘉靖間南京神樂觀道士袁素居果有一枚極善捕鼠而走不成步循簷上壁如飛也吾友俞亭川親見之

貓哭

二申野錄崇禎辛巳春二月楚府貓犬流淚有哭泣聲

卜思鬼

風土記邪術有卜思鬼者婦人習之夜化爲貓犬遇病者攝其肉唾水中化爲水蝦取而貨之

餌丹

茅亭客話載以靈砂拌食餌獠獠鸚鵡貓犬等變其心輒會人言

王海藏天師草還丹此藥久服則身輕若髮白者從根而黑永不白有不信者將藥拌飯與白貓喫一月卽黑

禽獸皆作人言

秋坪新語李姓安德巨族所畜貓鴨犬豕忽作人言時喧時默紛呶不已家人駭怪方欲盡執而殺之惟一老雄雞如常主人語衆曰物皆言矣惟此尚不爾忽聞背後語曰小人不的回顧卽雄雞也遂盡殺之家道自此式微

貓作人言

夜譚隨錄某公子爲筆帖式家頗饒裕父母俱存喜畜貓每食則羣集案前嗷嗷聒耳日以爲常一日夫人呼婢數回不應忽聞窗外有代喚者聲甚異公子啟簾視之寂無

徐蟬小錄 卷四
人唯一貓奴踞窗臺上向公子面有笑容公子大駭入告
夫人諸昆弟聞之同出視貓戲問適聞喚人者乃汝耶貓
曰然衆大譁其父以爲不祥亟命捉之貓曰莫拏我言訖
一躍徑上屋檐而逝數日不復至一日衆飼貓乃雜衆中
來食小婢識之以告因獲之縛而鞭之數十貓但嗷嗷欲
殺之父不欲乃命二僕盛以米囊負而投諸河甫出城囊
已空及歸貓已先返直至寢室啟簾而入父子兄弟方咸
集論貓事瞥見貓來皆惶懼貓登踞胡床視其父目眦欲
裂厲聲罵其父曰何物老奴尸居餘氣乃欲謀殺我耶大
罵不已衆怒咸擊之貓破窗躍去不復再來後其家以疾
疫死亾殆半焉

夜譚隨錄宋野亭黃門言其戚家喜畜貓忽有作人言者
察之貓也大駭縛而撻之貓曰死有不能言者但犯忌不
敢言耳若牝貓則未有不能言者家人不之信再縛他貓
牡者撻而求其語初但嗷嗷以目視前貓前貓曰我且不
得不言况汝耶於是亦作人言求免其家始信而縱之後
家亦不祥

耳食編有某公夜寢聞窗外偶語潛起窺之乃其家貓與
隣貓言耳隣貓曰西家取婦蓋往觀乎家貓曰其廚爨善
藏不足稅吾駕也隣貓又曰雖然姑一往何害家貓又曰
无益也隣貓固邀家貓固却往復久之隣貓躍登垣猶遙
呼曰若來若來家貓不得已亦躍從之曰聊奉伴耳某聞

大駭次日執而將殺之貓大呼冤偶手懈貓竟逸去亦無他異

貓唱歌

夜譚隨錄護軍參領舒某喜謳歌行立坐臥罕不嗚嗚一日友人過訪歡飲于室漏已二下尚相歌不輟忽聞戶外細聲唱所謂敬德打朝者諦聆之字音清楚合拍妙不可言心異而窺之乃見一貓立月中旣歌且舞舒驚呼其友貓已在牆一躍而逝然餘音猶在牆外耳

狸怪

異苑元嘉十年長山留元寂曾捕得一狸剖腹復得一狸又破之更獲一狸方見五臟三狸雖相包懷而大小不殊

元寂不以爲怪以皮掛於屋後其夜有羣狸繞之號呼失皮所在寂家亦無他異

幻化

書影叢說雲南半箇山婦人怪或化異物富家化牛馬貧家化貓狗化去可歸

滇黔紀游賓州瘴氣甚濃四五月間雞足道絕人行更有變鬼者婦女居多或變貓變羊雞鴨牛馬象遇單客殺奪其貨其人面黃眼赤神情恍惚易識

滇程日記苗人能變牛馬貓犬等形夜入人家
月仙叢談廣南中夷人多能變爲犬貓

災異

典故紀聞正德七年京師赤黑青 見大者如犬小者如貓若風行有聲夜出傷人有至死者踰月始息

禁貓鬼

寧武俗祀貓鬼其畫象貓首而人身男女夾侍間能爲祟於民間爭相禱祠巫者緣以爲利 彭禮宰是邑拘衆巫至盡搜其畫象而焚之城隍神前械衆巫於衢出告諭嚴禁風遂革其子兆孫有牒城隍驅貓鬼文載 堂集

中

果報

生死扼喉

舊唐書高宗寵武后廢王后及蕭淑妃蕭罵曰百生千劫

願我託生爲貓見阿武爲老鼠生生世世扼其喉以報今日足矣

竹窗隨筆武后效人彘殺王后等且死誓願生生世世已爲貓武爲鼠生扼其喉而噉其肉至今貓鼠中尚有二人受生雖報復千萬遍未已也往時予作水陸齋憫而薦之祇恐冤力深薦力淺未能遽釋

章惇後身

天中記宋有虞仙姑詣蔡京見大貓蹲踞榻上撫其背謂蔡京曰識之否此章惇也

牒訴李和子

酉陽雜俎元和初上都東市惡少李和子父努眼和子性

忍常攘狗及貓食之爲市坊之患嘗臂鷄立於衢見二人
紫衣呼曰公非李努眼子名和子乎和子卽據祇揖又曰
有故可隙處言也因行數步止於人外言冥司追公可卽
去和子初不受曰人也何給言又曰我卽鬼因探懷中出
一牒印窠猶濕見其姓名分明爲貓犬四百六十頭論訴
事和子驚懼乃棄鷄子拜祈之且曰我分死耳必爲我暫
留具少酒鬼固辭不獲已初將入畢羅肆鬼掩鼻不肯前
延於旗亭杜家揖讓獨言人以爲狂也索酒九盃自飲三
盃六盃虛設於西座且求其爲方便以免二鬼相顧我等
旣受一醉之恩須爲作計因起曰姑遲我數刻當返未移
時至曰君辦錢四十萬爲假三年命也和子諾許以翌日

及午爲期因酬酒直且返其酒嘗之味如水矣冷復冰齒
和子遽歸貨衣具鑿楮如期備酌焚之自見二鬼挈其錢
而去及三日和子卒鬼言三年蓋人間三日也

貓報

太平廣記進士歸係暑月與一小孩子於廳中寢忽有貓
大叫驚孩子使僕以枕擊之貓偶中枕而斃孩子應時作
貓聲數日而殞

轉劫輪宋呂德卿家一庖婢曰慶喜置兔脂於廚爲貓竊
食主母諄語婢不勝憤擒貓擲於積薪上適中木叉簽腹
洞過腸胃流出號呼一晝夜而絕後一歲婢因曝衣失足
仆地爲鋸竹片所傷小腸穿破洒血被體次日亦亾宛似

後雖小錄
三
貓死景狀

宋治平中朱沛好養鴿一日貓食鴿沛收貓斷四足號呼宛轉堂室間數日而死後沛妻產子俱無手足

冷賞村農畜貓色純黑貓傍爐火睡熟遂鎔錫汁鉗口灌之取其皮爲冠數日後忽大呼貓嚙我喉喉舌塞不下食而死

消夏錄閩中某夫人喜食貓則先貯石灰於罌投貓於內而灌以沸湯貓爲灰氣所蝕毛盡脫落不煩搗治血盡歸於臟府肉瑩白如玉云味勝雞雛十倍也日日張網設機所捕殺死算後夫人病危叻叻作貓聲越十餘日乃死
盧觀察攜吉嘗隣居攜吉子蔭文予壻也嘗爲予言景州

一宦家子好取貓犬之類拗折其足捩之向後觀其子子跳號以爲戲所殺亦多後生子女皆足踵反向前

受杖準地獄

杭州寶藏寺主藏僧志詮所得施財无毫髮侵用偶寺僧有謂詮曰子所積貸我十千當三千爲息歸子卽如數付之數月果以十三千償詮詮曰三千之息非常住物因以爲香燭之費常畜一貓甚馴起居之間未常相捨後貓死詮晝夢一官府有紫金人出迎如舊相識曰某前身有過合受畜生爲貓償報已盡今爲冥官方爲貓時蒙師受育之恩每思有以報効師前受寺僧貸藏施錢三千之息已是亦准盜法當受地獄一劫之苦某亦常爲師參

問比折之報只有於世間受十三杖可代此外無策也歲餘會錢塘縣官攜家累入寺僧適盡赴供死一人迎門者縣官已懷怒始登方丈而足爲貓糞所污意大憤躁從者於懺堂拵志詮而出云此住持僧也怠於却掃詮亦不測其由卽呼五伯杖之十三而去詮始悟前夢常戒其徒不可以常住物爲已用者如此云

金貓因緣

雜寶藏經昔惡生王遊觀園林堂上見一金貓從東北角入西南角王卽使尋發掘得一銅釜受三斛滿中金錢漸漸深掘復得釜次第各受三斛傍掘不已滿五里許盡獲銅釜盛滿金錢時王深生奇怪卽詣尊者迦旃延所問得

錢所由尊者曰此王宿福但用无害王問何因曰毘婆尸佛法中有比丘施大高座置鉢于上唱言誰有能于堅牢藏中舉錢財者入此藏中有賣薪者適得三錢歡喜著鉢還家五里步步生喜爾時賣薪人者今王是也以因往昔三錢施緣世世尊貴常得如此三重錢釜緣五里中步步歡喜恒於五里有此金錢王聞宿緣歡喜而去

償債

泊宅編和州烏江縣升寺中僧有負主僧金久而不償病且革誓爲畜生以報旣卒主僧晝寢夢病僧披衣槃跏入床下覺而異之須臾貓生一子稍長極馴擾重七八觔每客至則歡迎走報見非其人者輒謹隨入有知呼其名必

前怒噬至主僧呼則昂首號叫若求隱其事者
西樵野記弘治初吳郡北寺僧了庵畜一白貓自入山門
習養馴熟是僧主家諸僧咸死固心者乃搆一退處僧出
則以鑰授貓匿之僧歸鼓門貓則啣鑰鈴鈴而至若是者
五載忽僧夜夢貓作人言曰我前身是周海負汝之銀二
十兩故變畜至此明日債限滿當去矣僧寤異之次日貓
去不知所之

楊塾師

見聞記訓塾師楊姓者一日坐於門見一婦人過墜一銀
簪於街石上鏗然一聲伺其去遠就其所視之不見止見
一蚯蚓在石罅間踟躕良久俄一男子過其所徑俯拾之
楊老乃高聲曰此吾所墮簪也其人知其偽徑去楊老隨
牽其衣不釋其人乃取銀二分以半買魚一尾以半付之
曰將此銀沽酒煮魚作一夜消可也楊乃歸令媳煮魚煖
酒忽隣貓突跳釜上媳以杖撲之貓竟啣魚去因覆酒人
皆憐而笑之

鼠報

宣室志寶應中有李氏子家洛陽世不好殺未嘗畜貓一
日大集親友會食於堂門外有數百鼠俱人立以前足鼓
舞如甚喜狀李氏親友空堂縱觀人去既盡堂忽摧圮死
一傷者

聞奇錄進士李照嘏舉十上不第主司晝寢忽窺見一軸

文在枕前乃照燬卷令遷於架上復寢暗視有一大鼠啣其軸復還枕前再三如此照燬及第主司問其故乃三世不養貓皆云鼠報

三生

廣異記曲沃縣尉孫緬家奴年六歲忽視緬母笑云孃子總角時曾養一野狸今憶否母亦省之奴云爾時野狸卽奴身也鷹逐走入古塚復爲獵人擊殪見閻羅王王以死罪當得人身遂生海州爲乞人子苦飢寒二十而死又見王王曰與汝作貴人家奴遂生已三世矣

眼大郎

鬼董杭優眼大郎夢人持文衾覆之自首至足束而加縻力拒不可饜而寤病日甚遂死死數日見夢於家曰前夢文衾爲大不祥今生爲貓黃質而黑章在沙皮巷某家子往視而俯泣白所以欲買歸貓主不肯或名呼之則仰視而俯膺

釘貓孽報

吳郡諸生某性殘暴多戕物命家畜一貓初甚愛惜旣因竊食以木板釘其爪棄諸河後登第官京師眷屬北上憩逆旅其妻抱乳週歲兒見旁臥一貓宛似當年所畜者捉足觀之貓鳴竄爪傷兒膚驚啼不止店主婦云數年前夫游蘇郡見貓釘板上觸舟而來起其釘畜之頗馴何一時頑劣乃爾妻聞之默然知爲孽報也兒竟以驚風症殤

程春渠子

驚喜集程春渠販布遼東易人參利甚豐生一子聰慧娶
艾媳甫二月悉將家資置貨命子先押抵京過山東白蓮
倡亂人貨皆亾婦聞抱恨齋戒誦經隣人送一虎斑貓肥
而馴婦畜之卽名阿虎聞呼卽至十年不離左右時有惡
少行姦偷見行竊不戒火燃俱得貓跳擲而覺厯害救免
一日貓示夢曰我非畜乃前夫也因前生作惡今被殺閻
王查我殺牲過多故墮畜類幸不犯淫戒與汝十年恩愛
未絕故爲貓伴爾今見汝苦節誦經功滿當轉生爲男我
亦聽經得爲人與汝作同胞兄弟婦寤大慟隨絕貓亦死
程信之將貓置棺後而並殮焉

家不養貓

覺世經明施有聲慈及於物家不養貓不令子弟養鷹鷂
作有司不許人打獵并禁鳥槍密網一切害物之器後官
臬司壽八旬有五



